

սախ հեռու, մի ընդարձակ հովտում ընկած է Սնկերտը. դա զատ-զատ, երեք անշուք թաղերից բաղկացած մի գիւղ է, ուր տները աչքի են ընկնում իրենց անպաճոյճ կառուցւածքով: Խմելու ջուրն աղբիւրի է, որ բղիտւմ է գիւղի փէշերից, իսկ արևելեան կողմը փռւած են ծառազարդ արտերը, որոնք գիւղին գեղեցիկ տեսք են տալիս, բայց նրա զարդը հանդիսանում է դէպի արևելք տարածւող գետակը, որն օձապտոյտ հոսում է արտերի փէշերից:

Գիւղը գուտ հայաբնակ է, 94 տնով, 630 շնչով, որից 314-ը արական է և 316-ը իգական: Նրանք գաղթած են Հին — Զուղայի գիւղերից 1606 թւին, Շահ-Աբբասի ձեռքով. պարապում են երկրագործութեամբ և անասնապահութեամբ:

Հողը պատկանում է 3 կալւածատէրերի՝ Մամթաղի, Միրփանջ և Մէհգի-Ղուլի, որոնց մէջ բաժանւած է հողը: Գիւղացիներից միայն հինգ տուն հող ունեն, մնացեալները հողագուրկ են. նրանք մի հաբբային 7 բեռ ցորեն են տալիս աղաներին. մօտաւորապէս տարեկան 504 բեռ ցորեն և զարի են վճարում: Հողը մեծ մասամբ ջրովի է, վարում են արօրով ու ցանում նոյն հացաբոյսերը:

Այստեղի գիւղացիութիւնը միանգամայն անտէր և անտիրական լինելով, մեծամասնութեամբ գտնւում է ծայրայեղ թշւառութեան մէջ. նա միշտ ենթակայ է աղաների և քէզխուղաների կամայականութիւններին. մասնաւորապէս գանգատուում էին գիւղացիները Ռուստամ քէզխուղայիցը և անէճքով լիշում նրա անուներ:

— Մայրիկ, ինչո՞ւ էք գանգատուում Ռուստամից, — դիմում ենք մի կնոջ, որ անվերջ բողոքում էր նրա մասին:

— Ա՛խ հողեմ նրա գլուխը, — արցունքոտ աչքով դարձաւ նա ինձ, — դեռ էրկու ամիս առաջ էր, որ նա տարաւ իմ չորս օղչարը էրկու բեռ ցորնի պարտքի տեղ. խիզաններիս (զաւակ) հացը բերնիցը կտրեց . . . այ բալամ, նա միացած է խաների հետ և մեր արիւնն է ծծում:

Քէզխուղայի հետ հարստահարում են և գիւղի աղա-